



22 JAN 2015

Hordaland barne- og ungdomsråd
Postboks 408 SENTRUM
5805 Bergen

Bergen 19.01.2015

Hordaland fylkeskommune
v/Fylkesrådmann Rune Haugsdal
PB 7900
5020 Bergen

Dykker referanse: 2014/986-13

Ber om tilbakemelding vedrørende saksgang i tildeling av oppdrag som teknisk arrangør for UKM Hordaland 2015.

Styret i Hordaland barne- og ungdomsråd (Hbur) syner til brev frå Kultur- og idrettsavdelinga hjå dykk til styreleiar i Hbur datert 02.12.2014, men først motteke av Hbur per e-post den 12.01.2015. Dei har der informert oss om at dei har bestemt at samarbeidspartner/teknisk arrangør for UKM Hordaland 2015 skal vere AKKS Bergen.

Hbur reagerer på ein svært uryddig saksgang frå Kultur- og idrettsavdelinga si side, der me oppfattar at munnlege avtaler og lovnader er brotne, og der mykje av sakshandsaminga har vore lukka for oss utan at me forstår kvifor. Som medarrangør av UKM i meir enn 20 år er me overraska over måten Hbur er behandla på denne hausten. Me vil under gi ei kort oppsummering av prosessen fram til no.

- Vår og sommar 2014: Hordaland Fylkeskommune (HFK) tar over som fylkeskontakt for UKM. Hbur får munnlege signal frå fylket om at dei ønsker Hbur med vidare i arbeidet med UKM, men no berre som teknisk arrangør.
- Sommar og haust 2014: Hbur deltek på mange planleggingsmøte og andre aktivitetar knytt til arrangementet UKM Hordaland 2015 med Kultur og idrettsavdelinga utan å få noko særskilt godtgjering for dette arbeidet. Godtgjering for dette arbeidet vart rekna som del av "UKM-godtgjeringa" me skulle få tildelt frå HFK på budsjettet for 2015.
- 07.10.14: Hbur er i møte med Kultur og idrettsavdelinga. Det er ein god dialog og felles oppfatning av å få på plass ein formell samarbeidsavtale om arbeidet med å vere teknisk arrangør for UKM Hordaland 2015-2016. Siste avtaleutkast frå HFK vart motteke på e-post den 20.10.14 (vedlegg 1).
- 04.11.14: Nytt møte med HFK. Hbur har no laga eit samandrag over dei oppgåver som teknisk arrangør vil utføre, samt oversikt over estimert timeforbruk for desse oppgåvene ut frå tidlegare års erfaring. Hbur er beden om å gjere det av di me kjenner godt til arrangementet etter å ha vore teknisk arrangør i over 20 år.
Me oppfattar på dette tidspunkt at Hbur og HFK no er einige om kva oppgåver teknisk arrangør skal ha. Det som gjenstår er å bli einige om kva storleiken på honoraret Hbur skal

få for å utføre oppgåva. Kultur- og idrettsavdelinga har føreslege kr. 100 000,- i årleg honorar. Me meiner derimot at riktig sum utifrå estimert timeforbruk til dei oppgåvane, som me er einige om skal vere Hbur/teknisk arrangør sitt ansvar, vil utgjere kr. 160 000,- årleg for UKM Hordaland 2015-2016.

Me gav i møtet uttrykk for at me kan møte dei på halvvegen på differansen mellom beløpa dersom me er restriktive med timeforbruk på møter osb. Dei kunne ikkje gje oss svar på det økonomiske spørsmålet i dette møtet, men dei gav oss munnleg tilbakemelding om at svar på dette spørsmålet ville kome i løpet av ei veka.

HFK er kjend med at det har vore utskifting av ansatte i Hbur siste året. HFK gjev i møtet uttrykk for at Hbur har ansvaret for å stille med naudsynt og kompetent personell til UKM Hordaland 2015. Umiddelbart etter møtet tar Hbur difor kontakt med og kjem i dialog med ein person som me vil engasjera som vikar for å jobba særskilt med UKM Hordaland 2015. Seinare same dag gir leiar i Hbur ved personleg oppmøte hos HFK munnleg informasjon til Kultur- og idrettsavdelinga om at me er i dialog med denne personen, og får positiv tilbakemelding på dette. Personen vert formelt tilsett som vikar hos Hbur i byrjinga av desember.

- Etter møtet den 04.11.14 er det mykje korrespondanse på e-post der me har purra på eit endeleg svar. Det einaste svaret me får frå fylkeskommunen er at det enno ikkje er teke noko avgjerd (vedlegg 2).
- 03.12.14: Etter fleire purringar får Hbur per e-post beskjed om at fylkeskommunen no ser etter andre arrangørar, og at endeleg avgjersle om kven som skal vere teknisk arrangør ikkje er tatt. Dette er fyrste gongen me vert gjort merksame på at fylkeskommunen også vurderer andre arrangørar (sjå vedlegg 2). Før denne tid har me tilslatt ny vikar, nettopp for å kunne vere med og arbeide med UKM Hordaland 2015, i den tru at me og fylkeskommunen hadde ein munnleg avtale om at me skulle vere teknisk arrangør.
- 19.12.14: Før jul høyrer me via andre at AKKS Bergen skal ha fått i oppdrag å vera teknisk arrangør for UKM Hordaland 2015. Me har enno ikkje fått noko tilbakemelding frå fylkeskommunen på siste avtaleutkast motteke den 20.10.14. Nestleiar i Hbur ringjer Kultur og idrettsavdelinga v/Ronny Skaar og Marianne Ose Askvik og ber om ei rask avklaring, då det vil ha mykje å seie for budsjett og drift av Hbur kor vidt me skal stå som teknisk arrangør av UKM Hordaland 2015 eller ikkje. Nestleiar blir fortald at endeleg avgjersle enno ikkje er tatt, og at fylkeskommunen for så vidt står «fritt til å bruke så lang tid dei vil på denne avgjersla». Me får likevel forståing for at ei rask avklaring er viktig for Hbur. Ein skulle tru dette også var viktig med omsyn til sjølve arrangementet.
- 12.01.15: Hbur får etter purring per telefon frå administrasjonen i Hbur endeleg skriftleg tilbakemelding frå fylkeskommunen med svarbrev datert 02.12.14. I brevet står det at Kultur- og idrettsavdelinga etter ein «grundig prosess... har bestemt at UKM Hordaland 2015 vil bli arrangert med AKKS Bergen som samarbeidspartnar. Hordaland fylkeskommune vil kome attende til ei ny vurdering for eit eventuelt samarbeid med Hordaland Barne- og Ungdomsråd for UKM Hordaland 2016.»

Ut frå vår vurdering, så ser dette ut til å ha vore ein noko uryddig prosess, og me har tilsette ved vårt kontor som me og lyt ta omsyn til. Me har difor følgjande spørsmål til fylkesrådmannen:

- Me har alle i styret og administrasjon i Hbur ei klar oppfatning av at Hbur og fylkeskommunen hadde ein munnleg avtale, der ein og kan syna til ein fast budsjettpost i fylkeskommunen sin budsjettplan dei siste 10 – 15 åra, om at Hbur skulle vere teknisk arrangør av UKM Hordaland 2015. Det vart ikkje gjeve noko signal i anna retning verken i møter, e-postutvekslingar eller samtaler før i e-post datert 03.12.14. Kvifor blir me først gjort oppmerksame på at andre aktørar blir vurdert i e-post 03.12.14?

- Kvifor blir det kommunisert tydeleg per e-post og i telefonsamtalar fram til 12.01.15 at ei endeleg avgjerd ikkje er tatt, når denne avgjersla i svarbrev frå Kultur- og ressursavdelinga verkar å vere tatt allereie 02.12.14?
- Dersom andre arrangørar/aktørar først vart vurdert etter siste møtet mellom Hbur og fylkeskommunen 04.11.14: Betyr dette at fylkeskommunen har brukta dei dokumenta Hbur utarbeida, med oversikt over estimert timeforbruk og kva arbeidsoppgåver teknisk arrangør vil ha med å gjere, til å hyre inn ein annan arrangør til UKM? Hbur meiner det er svært alvorleg dersom HFK på nokon som helst måte har brukta Hbur si oversikt på estimert timeforbruk og arbeidsoppgaver for teknisk arrangør i arbeidet med å skaffe ein anna teknisk arrangør.
- Hbur har på vegne av HFK vore arrangør av UKM Hordaland i over 20 år, utan at det har eksistert nokon skriftleg samarbeidsavtale. Me har difor full forståing og er einige med HFK om at det var naudsynt å få på plass ein formell avtale. Når Kultur- og idrettsavdelinga no har valt å setje vekk arbeida som teknisk arrangør av UKM Hordaland til ein annan aktør, vil dei eksterne kostnadane for dette arbeidet etter våre utrekningar overstige kr. 100 000,-. Har HFK følgt innkjøpsregelverket for offentlege anskaffingar i denne anskaffingsprosessen?
- Dersom Hbur igjen er aktuell som teknisk arrangør av UKM Hordaland i 2016, som antyda i siste brev frå Kultur- og idrettsavdelinga, vil me gjerne vite kva me kan gjere betre til neste år. Spørsmålet blir då: Kva kriterier låg til grunn for val av teknisk arrangør for UKM Hordaland 2015? Og kva er grunngjevinga for at Hbur ikkje vart vald som arrangør i 2015?

Hbur takkar elles for tidligare års oppdrag med å vere arrangør for UKM Hordaland, og ser fram til eit vidare godt samarbeid med Hordaland fylkeskommune i åra som kjem.

Med venleg helsing

For styret i Hbur

Øystein Rambjørg
Styreleiar

Ruben Dyrhovden
Nestleiar

Vedlegg:

1. Utkast av samarbeidsavtale vedrørande UKM Hordaland 2015-2016, motteke 20.10.14.
2. E-postkorrespondanse med Kultur- og idrettsavdelinga frå 03.12.14 til 12.01.15.

Kopi:

Hordaland fylkeskommune, Kultur- og ressursutvalet v/leiari Anne Beth Njærheim.
Hordaland fylkeskommune, Kontrollkomiteen v/leiari Torill Vebenstad.